


Ingenieronan Junior Tromp y Jossy Figaroa ta para tras di e preparacion pa proyecto di hospital Hopi contento cu renobacion y ampliacion di Dr. Horacio E. Oduber Hospital



Ingenieronan Arubano Junior Tromp y Jossy Figaroa a forma parti di e comision cu a traha duro den e preparacion y negociacionnan pa cu e proyecto di renobacion y ampliacion di Dr. Horacio E. Oduber Hospital. Diarazon ultimo ambos a expresa nan satisfaccion pa cu e firma di contract cu ta duna inicio n'e proceso di ehecucion y cu aki 4 aña lo percura pa un

hospital di nivel pa e pueblo di Aruba. Sinembargo e trabou p'e profesionalnan den infraestructura no ta caba aki, pero mas bien ta continua manera Minister Benny Sevinger a indica na e firmamento. Awor nan ta enfoca riba control di e calidad, presupuesto y schema di tempo di e proyecto pa esaki cumpli cu loke a keda stipula. Na opinion di ing. Ju-

nior Tromp, e parti mas dificil cu awor ta tras di lomba tabata esun di scoge e arkitecto pa e proyecto. El a comenta cu mester a evalua e proposicion di dos profesional di renombre mundial, esta un Hulandes y un Mericano.

A wak detayadamente nan plan y especificacionnan pa construcion. "Ora bo ta trahando den un

proyecto asina grandi e no ta bay facil, pero bo tin hopi obstaculo cu bo tin cu pasa riba nan pa bo yega na un punto final.

Awe mi ta hopi contento paso despues di hopi aña por fin e proyecto lo wordo realisa," asina ing. Tromp a comenta.

Ing. Jossy Figaroa a confirma cu e proximo enfoke lo ta ehecucion di e proyecto cu su debido control, mescos cu ta haci cu tur otro proyecto. Sinembargo, e ta confia plenamente den e futuro di e trabou grandi aki dor di e ekipo cu Stichting Onroerend Goed Aruba (S.O.G.A.) a percura pa tin. Ing. Figaroa a bisa cu: "Ta hopi importante pa mantene un

control riba trabou pa keda cla na tempo y e calidad describi." E ekipo ta consisti di profesionalnan den e area di construcion y infraestructura como tambe finanza pa tene un bista riba e nivel di construcion, e presupuesto y e liña di tempo pa cada fase di construcion. "Un proyecto cu a bay asina hopi tempo den preparacion no ta por nada. Tabatin hopi punto cu mester a hiba debate fuerte y na final a yega na un consenso," ing. Figaroa a bisa.

E ta splica cu e garantia pa pueblo di Aruba ta cu SOGA tin un bon team.

"Aki dos aña cu e prome parti cu ta un extension di e toren di e hospital y e dos aña cu ta bay ta renoba e hospital completo."